



Maria Cavegn 1938 – 2017

Gest la sonda sontga ils 15 avrel 2017 miera nossa cara sora Maria suenter ina operaziun el spital dalla Universitad a Turitg

La Maria ei naschida ils 9 octobre 1938 ord la familia Placi Cavegn e Victoria Cavegn naschida Deragisch

Aunc cun sis fargliuns ei nossa cara sora carschida si en in menaschiet puril gest sper baselgia a Sedrun. Il bab miera già igl onn 1949 ed ei tucca da segidar per in e scadin commember dalla familia nua ch'igl ei stau pusseivel.

Aschia ei era nossa cara sora semessa en ladinamein suenter las scolas da vischnaunca ch'ella ha frequentau cheu a Sedrun.

Igl emprem eis ella serendida a Lucerna tier ina familia e luvrau leu el tenercasa. Ei sto esser che Ella era fetg beinvesida tier tala familia demai ch'ella veva aunc adina bien contact cun quella familia.

Igl ira sco survienta aschia ei denton buca stau siu giavisch per pli liung temps.

Buca ditg sissu eis ella semessa en en la gastronomia nua ch'ella ha luvrau dabia onns a Lugano en ina Pensiun. Pli tard eis ella aunc stada en pliras piazze a Silvaplana ed a Flem tochen ch'ella ei serendida a Turitg e stada cheu pli u meins adina.

En il Restaurant Herdern ual sper il plaz da ballapei dil Hardturm ha la Maria surviu circa 15 onns. Demai ch'ils patruns da quella ustria han dau si muort vegliadetgna il menaschi ha ei giu num dad aunc encuir ina piazza tochen tier la pensiun.

Quella ha ella giu cletg da survegnir tier la polizia e quei el Lindenköfli, sco gidontra en cuschina ed el service. Era cheu era ella fetg cuntenta e restada tochen sia pensiun, circa 7 onns.

Suenter la pensiun ha la Maria aunc adina buca giu avunda dil survir. El menaschi dalla pervenda s. Giusep ha ella gidau ora a survir tier diversas occasiuns. Pia ins sa dir: Nossa sora Maria ha surviu sia veta, surviu, surviu ed aunc inaga surviu.

Maria ei stada in carstgaun fetg legher, adina cuntenta, da bunaveglia e plein energia. Ella ei era vegnida schazegiada dapertut nua ch'ella ha luvrau.

Pigl auter ha nossa sora giu da sbatter bia, gie fetg bia cun la sanadad. Adina puspei ha ella stuiu prender dimora el spital, tuttavia ils davos onns nua ch'ella haveva denton aunc adina gronda speranza da serestabilir dils mals.

La davosa operaziun, ina operaziun dil cor ei denton stada memia pesonta, aschia ch'ella ei buca pli serevegnida dalla narcosa.

Cheutras lessel supplicar da tener la defuncta en buna memoria, e sere-gurdar dad ella en Vossas oraziuns.

Quei mument lessel buca tralaschar d'engraziar ad in e scadin, che ei seregurdaus da nossa sora, seigi quei cun condolentschas a scret ed era a bucca.

E lu cordial engraziament per tuttas donaziuns en favur dad instituziuns caritativas. E sco davos engraziel fetg a tut quels che han priu part dalla sepultura.

Cara sora, grond engraziament per tut il bien ed il Tutpusssent detti a Ti il ruaus perpeten.